

02/05/1998

Kelab Kenu UUM susuri Tasik Kenyir

KELAB Kenu Universiti Utara Malaysia (UUM), Sintok Kedah baru-baru ini berjaya menganjurkan ekspedisi menyusuri Tasik Kenyir, Terengganu.

Ekspedisi yang dikenali `Kenyir Discover 98' (KenDisc) bertemakan - Bersemuka dengan alam' itu disertai oleh 38 peserta yang terdiri daripada pelajar UUM.

Ekspedisi itu bertujuan membentuk nilai-nilai murni seperti semangat bekerjasama dan saling bantu membantu di samping peserta berpeluang meninjau sendiri keindahan Tasik Kenyir yang terkenal dan mempunyai gua-gua batu kapur, sungai, jeram dan lebih 14 air terjun serta lebih 340 pulau yang membentuk lanskap tasik itu.

Pengarah ekspedisi, Helip Loni, berkata objektif utama projek itu adalah untuk melahirkan bakal graduan yang lasak dan tahan cabaran dari segi fizikal dan mental.

Katanya, di samping itu, peserta ekspedisi juga berpeluang menghayati dan menghargai khazanah alam semula jadi.

Menurutnya, ekspedisi itu adalah julung kali diadakan hingga memasuki kawasan Taman Negara Sungai Cacing.

"Ekspedisi bermula dari Pengkalan Gawi menuju ke Sungai Cacing dan berpatah balik ke Empangan Sultan Mahmud.

"Kami bermalam dan berehat di Air Terjun Sauk, Air Terjun Lasir, Pulau Mahathir, Gua Bewah, Sungai Cacing dan Taman Negara Tanjung Mentong," katanya.

Katanya, pengalaman meneroka Gua Bewah, berkayak di tasik yang jernih dan mempunyai kedalaman menghampiri 300 meter di beberapa tempat dan berakit di Sungai Cacing merupakan detik-detik yang sukar dilupakan oleh peserta ekspedisi.

(END)